

**Laporan Penambahbaikan Pilihan Raya Diedarkan Isnin
Bernama
1 April, 2012**

KUALA LUMPUR, 1 April (Bernama) -- Laporan Jawatankuasa Pilihan Khas Parlimen (PSC) Berhubung Dengan Penambahbaikan Proses Pilihan Raya akan diedarkan kepada semua anggota Parlimen (MP) Isnin.

Pengerusinya Datuk Seri Dr Maximus Ongkili, berkata bagaimanapun laporan itu dijangka hanya dibentangkan di Dewan Rakyat pada akhir minggu depan.

"Laporan itu adalah menyeluruh dan menyentuh semua isu utama. Sesetengahnya dipersetujui, sesetengahnya tidak. Tetapi anda akan dapat lihat semua itu dalam laporan itu. Tunggu sehingga esok. Kita akan tahu apakah cadangan yang dibuat," katanya semasa dihubungi.

Dr Ongkili, yang juga Menteri Sains, Teknologi dan Inovasi berkata laporan itu mengandungi 22 cadangan untuk dipertimbangkan oleh kerajaan.

Ia dikumpulkan oleh sembilan anggota PSC pada pendengaran-pendengaran awam dan daripada maklum balas sejak ia memulakan kerjanya pada 2 Okt tahun lepas. Lima daripada anggotanya ialah daripada Barisan Nasional (BN), tiga daripada pakatan pembangkang PKR-DAP-PAS dan seorang anggota Parlimen Bebas.

PSC juga menubuhkan lima jawatankuasa kecil untuk meneliti memorandum yang dihantar terus kepadanya. Ia menyiapkan kerjanya pada Rabu lalu selepas mengadakan 14 mesyuarat dan enam sesi inkuiri awam.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=656213>